

CBETA電子佛典集成

CBETA Chinese Electronic Tripitaka Collection
ebook

X70n1387

劍關子益禪師語錄

(侍者)善珙·德修·慧澄·
銳彰·心寧·慧恭 編

目次

- [編輯說明](#)
- [章節目次](#)
 - [No._1387-A_劍關禪師語錄序](#)
 - [No._1387-B](#)
 - [目次](#)
 - [劍關和尚初住隆興府興化禪寺語錄](#)
 - [住隆興府雲岩壽寧禪寺語錄](#)
 - [福州西禪怡山長慶禪寺語錄](#)
 - [小參](#)
 - [結夏小參](#)
 - [解夏小參](#)
 - [冬至小參](#)
 - [除夜小參](#)
 - [拈古](#)
 - [頌古](#)
 - [趙州訪茱萸](#)
 - [芭蕉示眾你有主丈子我與你主丈子你無主丈子我奪你主丈子](#)
 - [僧問趙州狗子還有佛性也無州云無](#)
 - [岩頭纔跨德山門便問是凡是聖山便喝頭便禮拜](#)
 - [僧問智門蓮花未出水時如何門云蓮花出水後如何門云荷葉](#)
 - [趙州勘婆](#)
 - [六祖風旛](#)
 - [香巖擊竹](#)
 - [靈雲見桃花](#)
 - [地藏栽田](#)
 - [仰山摘茶](#)
 - [法語](#)
 - [澤長老出世慶成雷語](#)
 - [偈讚](#)
 - [出山相](#)
 - [觀音](#)
 - [啞子觀音](#)
 - [維摩](#)
 - [達磨携履](#)

- [布袋](#)
- [寒山把蕉葉執筆](#)
- [拾得携茗盞](#)
- [靈照女](#)
- [朝陽](#)
- [對月](#)
- [佛鑑和尚](#)
- [白讚慶成長老請](#)
- [禮開山伏虎祖師塔](#)
- [綿州曇上人求語上徑山](#)
- [祥侍者化供](#)
- [偶成](#)
- [一上人之徑山](#)
- [欽禪人之天童](#)
- [傳上人之徑山](#)
- [全上人之仰山](#)
- [祖典座往南嶽](#)
- [化夏供](#)
- [贈月蓬相士](#)
- [小師慧清游山](#)
- [題瑞雲峯](#)
- [題幽林寺](#)
- [謝東禪月湖以諸祖偈頌見示](#)
- [小佛事](#)
 - [佛鑑忌拈香二](#)
 - [為開元毒海和尚秉炬](#)
 - [德善淨頭下火](#)
 - [徹侍者入塔](#)
 - [悟藏主火](#)
 - [和上座火](#)
 - [小師慧燈火\(能接果木\)](#)
- [卷目次](#)
 - 1.
- [贊助資訊](#)

編輯說明

- 本電子書以「CBETA 電子佛典集成 Version 2023.Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

No. 1387-A 劔關禪師語錄序

曹溪之傳。馬駒散天下。莫盛於李唐。此師則蜀珍也。其後。始有德山圭峰出焉。至我朝中興。則圓悟尤盛。爾來敷歷五山。有若癡絕無準諸老。皆表表於時。余雖聞其語。而不及識其人。乙丑。劔關入閩來玉融。相求於溪上。余方外友雖多。而識蜀人。則昉乎此。挹其容峩峩然。聽其言洒洒然。了暢而通明。則南宗之學也。豪特而亢爽。則西州之氣也。來往語移時。若有意於余者。心甚奇之。每惜其匆匆而去。無何。聞已示寂矣。為之咨嗟累日。轉臂三霜。却未知此錄已刊之怡山矣。庚午秋。澤兄。乃以寄似。雖三持杓柄。諸作俱在。鋒稜峭峻。霜凜芒寒。殺活縱橫。無所撈摸。真風穴楊岐種子。但室中機緣。恨不一見。偈贊拈誦。亦不應止此。豈傳者遺落不具耶。抑此老棄擲不留耶。因為之亂曰。禪本無覺。非覺無見也。道本無言。非言無傳也。因言而覺。則此編之傳足矣。若背覺而迷言。則是甜是苦。皆為毒藥。雖多奚以哉。劔關。名子益。劔州人。法子崇澤也。今主席鄉之慶成。咸淳庚午重九日。中大夫新除祕閣修撰提舉建寧府武夷山冲佑觀林(希逸)書。

No. 1387-B

劔關法兄。袖藏匕首。不立孤危。鍊額銅頭。望風乞命。今雖亡矣。芒刃霜寒。舐蜜之者。各宜照顧。淳已南至。雪峰弟惟一拜手書。

No. 1387

劔關和尚語錄

目次

- 序
- 隆興府興化禪寺語錄
- 隆興府雲岩壽寧禪寺語錄
- 福州西禪怡山長慶禪寺語錄
- 小參
- 拈古
- 頌古
- 法語

- 偈讚
- 小佛事

劍關和尚初住隆興府興化禪寺語錄

侍者 善珙 德修 編

師。於嘉熙三年正月入院。

指三門。我此一門。初無關鍵。半合半開。東扇西扇。雖然。千聞不如一見。

踞方丈。不行喝不行棒。負命衲僧。不釣自上。

山門疏。一字不著畫。八字沒兩[必-心]。文彩甚分明。何待重饒舌。

江湖疏。行不到處行一步。說不到處道一句。徑山諸公。見義勇為。靈隱師伯。拔劍相助。且道。節文在甚麼處。眼睛裏聽取。拈法衣。黃梅夜半。雞足峯前。承虛接響。互相熱瞞。益上座。只今瞞你諸人去也。遂搭衣。

提綱。伏虎崑高。風生萬壑。青龍水急。浪湧千尋。古佛門庭。八字打開。第一義諦。熾然宣說。新長老。到這裏。通身是口。通身是舌。更說箇甚麼即得。未免只據見成公案。舉似諸人。俊快底承當得去。便見三邊肅靜。四海晏清。塊雨條風。民康物阜。正恁麼時如何。道泰不傳天子令。時清休唱太平歌。

舉三聖道。我逢人即出。出則不為人。興化道。我逢人即不出。出則便為人。

拈云。大眾。還知二大老落處麼。亞夫金鼓從天落。韓信鎗旗背水陳。

當晚小參。(問答不錄)長劍倚天。鋒鋦不露。三賢莫辨。十聖那知。(豎拄杖云)看看。鋒鋦露也。寒光射斗。勁氣凌霜。逢佛殺佛。逢祖殺祖。盡大地人。誰敢正眼覷著。這裏莫有不顧危亡。向刃下翻身底麼。(卓拄杖)放過一著。

復舉。馬大師令僧馳書往徑山國一祖師處。一發緘。乃見一圓相。遂於圓相中。下一點封回。忠國師聞得乃云。欽師猶被馬師惑。

拈云。馬大師用盡平生伎倆。到國一面前。不消一點。因甚南陽却道。欽師猶被馬師惑。(良久云)人必自侮。國必自伐上堂。取初句向上機。瞿曇不會。達磨不知。知不知。兩餘千嶂碧。春水一溪肥。觀靜二維那至上堂。一槌便就。瞞瞞盱盱。不假一槌。無端無端。畢竟如何。忙裏工夫閑處覓。鬧中消息靜中觀。

中秋上堂。天上月圓。人間月半。明眼衲僧。見似不見。見麼。(擲下拂子)盞子撲落地。櫟子成七片上堂。向上一路。千聖不傳。未曾擬議。早隔大千。所以。雪峰鞦韆。禾山打鼓。仰山插鋤。地藏種田。雖然。短綆那汲深泉。

至節上堂。去年今日逢冬節。撲頭撲面迎霜雪。今年冬節又來臨。屋角梅花弄曉晴。(拍膝)笑它魯史謾書雲。

上堂。與麼寒。何處避。冰稜上。深雪裏。有來由。沒巴鼻。丹霞燒木佛。院主眉鬚墮。

上堂。(拈拂云)信手拈來。萬選萬中。輕若鴻毛輕。重似丘山重。(擲拂云)雖是死蛇。也要活弄上堂。四九三十六。夜眠如露宿。銀海眩生花。玉樓寒起粟。翻笑二祖立雪謾齊腰。活埋一片無瑕玉。

上堂。昨日雨。今日晴。桃花開口笑。無處覓靈雲。今日莫有不釣自上者麼。(良久云)掩彩殺人佛生日上堂。二千年前。通身是垢。二千年後。滿面埃塵。直饒九曲黃河水。洗到驢年也不清。

謝首座藏主秉拂上堂。潑天聲價陳睦州。咬人火急瞋睡虎。行不到處行一步。道不到處道一句。德山臨濟眼[目*荅]眇。棒喝交馳無所措。興化忍俊不禁。(卓主丈)隨例赫日光中飛白雨。(驀召大眾)照顧濕却袈裟角。

上堂。世事悠悠。不如山丘。臥藤蘿下。塊石枕頭。所以許由洗耳。巢父飲牛。又有底道。何不舖其糟而啜其醜。隨其波而混其流。這一隊擔板漢。能收不能放。能放不能收。且如何是全收全放底句。(以拂擊禪床)大鵬展翅蓋十洲。籬邊燕雀空啾啾。

端午上堂。(舉拂子。召大眾云)還見麼。名不得。狀不得。脫胎換骨方。起死回生訣。信得及底。不消一服。諸病頓除。脫體安樂。何必善財重採藥。

中夏上堂。一日復一日。眨眼過半夏。興化老無知。鉢盂安柄杷。引得四海參玄人。三三兩兩聚頭。商量這個話。阿呵呵。六月賣松風。人間恐無價。

請監收上堂。欲明此道。須遇其人。其人既遇。十倍收成。且道。是那個道字。(良久云)明破即不堪重九上堂。秋未霜。菊正芳。千朵萬朵香吐蘂。三枝兩枝金樣黃。不作世諦流布。亦非佛法商量。九月九日是重陽。

上堂。恁得深夜寒。破曉清霜重。雙澗水無聲。千峯雲欲凍。這裏冷湫湫。那邊熱闐闐。不知那個得便宜。慚愧楊岐老凍膿。

謝西堂首座藏主上堂。(豎拂云)格外提持。斗轉星移。智藏不會。海兄不知。耐耐睦州擔板漢。教壞臨濟小[病-丙+斯]兒。(拍床云)此意明明說向誰上堂。見見之時。羯諦羯諦。見非是見。波羅羯諦。見猶離見。波羅僧羯諦。見莫能及。菩提薩婆訶。(驀召大眾云)還見釋

迦老子麼(便下座)上堂。天寒地冷。晝短夜長。死灰撥盡。沒可商量。昨夜三更月到窗。

上堂。作無所作。為無所為。灰頭土面。帶水拖泥。恁麼要見興化。快須照顧兩莖眉。

上堂。如來禪只在口皮邊。祖師意不過方寸地。因甚十个五双。知似不知。見如不見。(良久云)只為太近聖節上堂。正法輪輕撥轉。日出中天。雲開嶽面。如優曇花時一現。

上堂。有一人。在百尺竿頭。闊行大步。口不能言。有一人。在萬人叢裏。罵雨呵風。足不能履。且道。那个優。那个劣。(卓主丈云)分浴佛上堂。佛身長三尺。杓柄長三尺。佛身長丈六。杓柄長丈六。佛身長無量百千萬億那由他由旬。此之杓柄亦復爾。青龍將底報深恩。隨例香湯灌頂門。

舊住至上堂。玄沙不出嶺。拄杖生根休用剪。保壽不渡河。鉢盂無柄不須安。只如善財童子。於覺城東際。受文殊教。遊歷百一十城。參五十三善知識。末後於彌勒樓閣彈指聲中。還有這個消息也無。(乃云)蘇嚧蘇嚧。

六月望上堂。酷暑炎炎何處避。不在鑊湯爐炭裏。北窗一枕黑甜餘。細聽松風雜流水。

謝首座藏主秉拂。上堂。一見便見。天回地轉。宗通說通。風虎雲龍。只如百丈被馬祖一喝。因甚三日耳聾。(良久云)閩蜀同風上堂。日可冷月可熱。眾魔不能壞真說。且作麼生是真說。屋頭泉溜響無休。砌下寒蛩聲更切。

上堂。一日復一日。一秋復一秋。從頭屈指數。屈指又從頭。烏飛兔走幾時休。(召大眾云)莫有不隨世態炎涼底麼(拍禪床下座)修橋上堂。得路塞路。過橋斷橋。不拘兩岸。不滯中流。直饒你會得步行騎水牛。我更問你。空手因甚把鋤頭。

上堂。冬前冬後。沙飛石走。時節到來。不容袖手。興化雖無駟風走電之謀。也要應個時候。(卓主丈云)一九二九。

謝維那知客副寺典座上堂。十聲槌下定綱宗。送去迎來事一同。豎百橫千有通變。笊籬無柄舀春風。

上堂。般若鋒。金剛筈。覲面當機。突出難辨。(豎拂云)見麼。春風一陣來。落花飛片片。

黃龍寧首座至上堂。憶昔玉几時。分賊不合火。今日驀相逢。依然眾恁麼。不恁麼。睦州檐板。雲門脚踏。

住隆興府雲岩壽寧禪寺語錄

侍者 慧澄 銳彰 編

聖節上堂。心如虛空不可量。聖君壽量亦如是。(卓主丈)將如是法報皇恩。天上人間更無比上堂。一夏九十日。半月已過了。有問蠟人冰。鼻孔仍依舊。(遂展手云)我手何似佛手上堂。是句亦割。非句亦割。德山焚疏鈔。臨濟燒禪板。堪悲堪笑。一對無孔鐵鎚。驢年夢見正法眼。

上堂。古佛心即于今。春風浩浩。春雨霖霖。(擊床云)高山流水少知音。

佛涅槃上堂。法身充塞太虛空。出沒何曾有定蹤。獨許波旬知此意。半偷歡喜半槌笞。

上堂。時節既至。其理自彰。井井秧浮綠。村村麥弄黃。半窗山月白。一枕竹風涼。笑倒山前鄧八郎。

謝藏主維那侍者。上堂。進以禮退以禮。錄得語一篇。不在紙衣裏。所以智藏被馬師塗糊。克賓遭興化鈍置。千古之下。掛人唇齒。恩大難酬。痛入骨髓。撿點將來。玄沙道底。

解夏上堂。覺性海中。圓無不融。聞時富貴。見後貧窮。窮則變。變則通。(擲下主丈)草鞋寧似虎。主丈活如龍。

中秋上堂。十五日已前明似鏡。十五日已後曲如鎌。正當十五日。(以兩手捺膝云)無人知此意。令我憶南泉。

重九上堂。秋江清。秋月白。登高雙眼空。獨步乾坤窄。隻手未曾舉。黃菊已盈握。好彩從來奔覲家。隨分一盞茱萸茶。

修後架上堂。東司頭糞坑上。臭氣薰天。如何近傍。一屙便了底。痛與一錐。的的卓卓底。三十主丈何故。有功者賞。

上堂。常光現前。壁立萬仞。(以拂劃一劃)者裏一劃劃斷。別有一條捷徑。明眼人。因甚落井。

遊寶山觀佛頂舍利。兼訪九蓮兜率歸。上堂。親從寶山來。收得寶山寶。(舉拂云)一片玉無瑕。千峰雲脫帽。九蓮峰畔無處藏。兜率宮中卒難討。歸來打鼓普請看。(擲下拂子)盤走珠兮珠走盤至節上堂。

(拈丈云)六陰既窮。群魔自殄。一陽來復。吾道大亨。主丈豎。十方世界一時豎。主丈橫。十方世界一時橫。(卓一下云)兵隨印轉。將逐符行佛成道上堂。未入山時。氣衝牛斗。出得山來。衣穿露肘。更言午夜見明星。不知面皮厚多少。

因雪上堂。六出花飛。無地卓錐。填溝塞壑。絕毫絕厘。嘎。忽驚捲盡青山去。又喜重携春色歸。

上堂。至玄至妙。至奧至微。不可以識識。不可以智知。與麼會得。呖啞嘯嘯。不與麼會。鳳林吒之。

正旦上堂。主丈生根劫外春。斬新拈出示諸人。(以主丈劃一劃云)擘開華岳千峰秀。放出黃河一派清。

福州西禪怡山長慶禪寺語錄

侍者 心寧 慧恭 編

師。於咸淳元年五月入院。陞座拈香。祝聖罷。(問答不錄)乃云。聖諦第一義。高不可仰。深不可窺。無上妙覺心。大包天地。細入無間。諸佛親證。而無所得。百姓日用。而不知。金鷄啼處露堂堂。青鳳舞時明歷歷。向這裏負荷得去。靈山一會。總在目前。堪報不報之恩。共助無為之化。還委悉麼。天上有星皆拱北。人間無水不朝東。舉孝宗皇帝問佛照禪師云。世尊雪山六年。所成者何事。佛照奏云。將謂陛下忘却。臣僧今日借水獻花。輒成一頌。問處分明答處親。太平天子太平臣。等閑喝散千峰雪。此土西天一樣春。留兩班上堂。現成公案。了無遷變。入得門來。一見便見。左顧則獅子嘯呻。右盼則象王迴轉。靈山一會儼然存。捏聚春風成一片。上堂。九十長期。三分過二。覺海浪平。鐵缸無底。寒山子水牯牛作麼生。切不得道。大家在這裏。

上堂。伏暑未收。金風漸作。彈指聲中。門開樓閣。諸人還見彌勒麼(迺垂下一足)重九上堂。菊花黃。茱萸香。時節既至。其理自彰。且如何是自彰之理。德山低頭歸方丈。鵝湖驟步入僧堂。

黃檗寂叟和尚至。上堂。作家相見。啐啄尤乖。達士相逢。握鞭回首。撿點將來。已落第二。且道怡山今日與檗山如何相見。(彈指云)了臘八上堂。六載雪山修。幾乎沒合殺。半夜覩明星。和盲勃睽瞎。更言。奇哉大地一切眾生。具有如來智慧德相。但以妄想執著。不能證得。若據衲僧門下。當甚臭皮鞭。

謝虛庵首座秉拂上堂。語底默底不是。非語非默亦非。虛庵有一轉語。用處絕毫絕厘。眾中或有箇漢出來。以指夾鼻。又作麼生支遣。只向它道。三十年後。清平渡水。

上堂。春已過半。百花競芳。有些佛法。如何商量。(拍床云)千言萬語無人會。又逐流鶯過短牆上堂。(拈主丈召大眾云)有主丈與主丈。擊木無聲。無主丈奪主丈。敲空作響。還見芭蕉和尚麼。(靠主丈云)莫妄想。

佛涅槃上堂。瞿曇色相紫金容。雨後青山插半空。覩面當機如不薦。桃花依舊咲春風。

上堂。定本無門。從何而入。坐斷兩頭。中亦不立。沒可把。絕承當。風來一陣芰荷香。

乾會節上堂。舉僧問壽山。年多少。山云。與虛空同年。僧云。虛空年多少。山云。與壽山同年。頌云。虛空年與壽山同。答處由來在問宗。但見皇風成一片。不知何處是疆封。

上堂。六月中三伏節。到處去到處熱。還有不熱者麼。(噓一聲下座)
 上堂。世尊不說說。迦葉不聞聞。兩個無孔鐵鎚。打合一合乾坤。
 眾中或有個出來道。我會也我會也。怡山敢保。棗子渾崙吞。
 上堂。直下是直下是。賺殺人疑殺你。(以拂子指上云)上是天。(指下云)下是地。疑个甚麼。(良久云)參上堂。崑山求玉。玉不在於崑
 山。赤水尋珠。珠豈藏於赤水。益上座。空奮双拳。盡虛空界內。
 恒河沙數。一一撮來。無有不是寶者。因甚麼。主丈喚作主丈。拂
 子喚作拂子。(良久云)莫謾人好元旦上堂。律管吹灰。勾芒布令。六
 國風清。九天雲靜。有般漢不知時節。更出來道。如何是新年頭佛
 法。只對它道。伏惟懽慶。
 佛涅槃上堂。二月十五。瞿曇滅度。文殊頓足普賢悲。外道拊掌波
 旬舞。(拍床云)甜瓜徹蒂甜。苦瓠連根苦。
 上堂。識得一。萬事畢。佛法颺在它方。世法拈靠一壁。有問奇特
 因緣。立秋已過五日。
 中秋上堂。(豎拂子云)此段光明。輝天鑿地。靈山錯話。曹溪錯指。
 霧暗雲屯兮。歷歷常明。地陷天崩兮。也只如是。(擲下拂子云)賺殺
 你上堂。有一則語。久欲拈出。未動舌頭。遍界狼藉。且作麼生收
 拾(便下座)上堂。臘月二十五。一曲重新舉。唱寡兮和稀。韻高兮調
 古。堪悲堪笑。老東山。謾說豆子山前打瓦鼓。

結夏小參

宗乘一唱。三藏絕詮。祖令當行。十方坐斷。天無四壁。地絕八
 荒。一切處圓覺伽藍。一切時平等性智。以此九旬禁足。以此三月
 護生。大家水乳和同。同入大光明藏。眾中或有個裂裂挈挈棒打不
 回底。出來道。長安雖樂。不是久居。又作麼生支遣。(良久云)不因
 紫陌花開早。爭得黃鸝下柳條。

是句亦剗。非句非剗。斷貫禦飛龍。佛來也打。祖來也打。簸箕擡
 鷄子。豈不見。藥山問石頭。三乘十二分教。某甲粗知。嘗聞。南
 方直指人心。實未明了。乞和尚慈悲指示。欸出囚口。石頭云。恁
 麼也不得。不恁麼也不得。恁麼不恁麼總不得。折節攪黃河。藥山
 佇思。不快漆桶。石頭云。子因緣不在此。江西見馬大師去。知子
 莫若父。藥山至馬祖處。復如前問。熟處難忘。祖云。有時教伊揚
 眉瞬目。有時不教伊揚眉瞬目。有時教伊揚眉瞬目者是。有時教伊
 揚眉瞬目者不是。也不較多。藥山於是有省。遂作禮。已遲八刻。
 祖云。見个甚麼便禮拜。山云。某甲在石頭處。如蚊子上鐵

□□□□□□□□□□如是。宜善護持。面

□□□□□□□□□□□□□□□□□□□□□□□□□□□□

□□□□□□□□□□□□□□□□□□□□□□□□□□□□
□□□□□□□□□□□□□□□□□□□□□□□□□□□□
□□□□□□□□□□□□□□□□□□□□□□□□□□□□
□□□□□□□□□□□□□□□□□□□□□□□□□□□□
□□□□□□□□□□□□□□□□□□□□□□□□覺海。倘或不然。此去西天十萬程。

解夏小參

解開布袋結頭。蛟龍得雲雨。掀翻平等性智。鷓鴣在秋天。轉一步萬象點頭。垂一機千波競注。全生全殺。全主全賓。去無所從。來無所住。青龍門下。司空見慣。應是尋常。衲僧面前。不妨許你東去西去。去則不無前途。或有人問。畢竟作麼生祇對。(拍禪床云)若無舉頂拔山力。千里烏騾不易騎。得路便行。難逢快便。見機而作。盤裏明珠。轉轆轤活鱗鱗。便是八臂那吒。也遏捺不住。汝等諸人。一夏在這裏。每日長連床上。衲帔蒙頭。心灰口醜。七村裏土地相似。還知有這個消息也無。有則興化贈以之中。倘或未然。還我九十日飯錢來。

冬至小參

以思無思之妙。費力不少。返觀靈焰之無窮。一冬二冬。思盡還源。鼻孔依前在口邊。性相常住。冬至寒食一百五。理事不二。山是山水是水。真佛如如。莫將魚目作明珠。瀉山劃窠書朱。興化順朱填墨。莫有未言先領未舉先知底麼。有則出來。大家證據。其或未然。我且問你。真佛在什麼處。真正舉揚。法堂前草深一丈。古德恁麼道。早是入草了也。還有共相證據底麼。有則許你融五岳混滄溟。移南辰轉北斗。未為分外。設若未然。長裙短袖。抹土捺灰。大家隨例賀書雲。管甚堂前草淺深。智不到處。信口便道。地轉天迴。行不到處。信脚便行。崖崩石烈。有个漢。口不能言。足不能履。如一片頑石相似。直是無你理會處。無你提掇處。一向死葛怛地。只恁麼過。且道。一陽來復。君子道長。小人道消。於它分上。還有消長也無。(良久云)三生六十劫節屈書雲。日南長至。一點無風。千波競起。爭如興化這裏。脫粟淡黃齏。飽後和衣睡。更說甚麼以馬喻馬之非馬。以指喻指之非指。今冬也如是。來冬也如是。縱經百千萬劫。也只如是。(拍膝云)堪笑當年老玉泉。赫赤布衲無換替。

除夜小參

道不可學。學而得之非實學。禪不可參。參而得之非實參。從空放下。兩手撒開。機境頓忘。心法雙泯。直下如火聚。如太阿劍。近之則燎却面門。觀之則喪身失命。禪之與道。境之與心。向甚處著。正恁麼時。只如七十二候。二十四氣。還管帶得它也無。(卓主丈云)且置是事。

祖師心印。七凹八凸。向上一關。通途共轍。晨昏不禁。今古一如。來者自來。去者自去。豈不見。古者道。已透關者。掉臂徑去。未透關者。從關吏問可否。似這般底。豈堪共語。設使機先領旨。句外明宗。石火裏爭衡。針鋒上奪路。更須升興化堂。入興化室。見興化人。始得。見即見了。且道。新年頭。還有佛法也無。

(拍禪床云)山因底事亦頭白。柳到幾時方眼青。

舊歲已去。爆竹聲中留不住。新歲復來。秤鎚落地也生芽。明得去處。便知來處。來處既明。更須知有先天後地。不動不變。超佛越祖底一著子。始得。(豎拂云)見麼。到江吳地盡。隔岸越山多。

迎新送故。總是平常。佛法有無。陳年舊話。(豎主丈云)惟此一事實。要且沒可把。孤迥迥。峭巍巍。露髹髹。赤洒洒。四序不能遷。通身無縫罅。不問佛來也打。祖來也打。魔來也打。四方八面來四方八面打。或有个漢出來道。總不恁麼來時如何。(卓主丈云)洎合放過。

拈古

魯祖。見僧來便面壁。南泉云。我尋常向伊道。直須向佛未生已前究取。尚不得一个半个他恁麼驢年去。

師云。王老師恁麼道。且道。是肯它。不肯它。(良久云)會麼。言迹之興。異途之所由生也。

寶峯問岩頭。與麼與麼作麼生會。頭云。不恁麼不恁麼。又作麼生。峯云。是平實語。頭云。腰帶無鈎結。峯云。作麼生。頭云。上腰不得。峯云。是平實語。

師云。恁麼恁麼。拔劍攪龍門。不恁麼不恁麼。陣雲橫海上。為甚麼却成平實語。莫言咫尺渾無事。咫尺人間事不同。只如巖頭道。腰帶無鈎結。上腰不得。又作麼生。碁逢敵手難藏行。琴遇知音政好彈。

巖陽尊者問趙州。一物不將來時如何。州云。放下著。陽云。既是一物不將來。放下箇什麼。州云。放不下。檐將去。遂於言下大悟。

師云。人人只知巖陽於趙州言下悟去。殊不知檐一檐惺惺。換得兩籬濕[泳-永+盾]。且道。輕重如何。(良久云)檐折方知。

古德云。譬如牛過窗櫺。兩角四蹄俱過了。因甚尾巴過不得。

師云。人無遠慮。必有近憂。

為山寄鏡與東平。平接得示眾云。道是為山底。又在東平手中。道是東平底。又是為山寄來。道得即留取。道不得即撲碎。眾無語。遂撲下。

師云。為山好一面鏡。惜乎分付不著人。東平雖善品題。要且撲它不破。

新羅僧參天仙。方近前。仙把住云。未離本國。道將一句來。僧無語。仙便推出云。問你一句。便道兩句。

師云。大眾盡道。天仙以強凌弱。殊不知納敗愈甚。這僧如何。元不離新羅。

福州臥龍球禪師。因僧問。去却僕從。便請相見。龍云。眨上眉毛看。僧云。不恁麼時如何。龍云。山北去也。

師云。臨機應變。無蹲坐處。則不無臥龍。借乎。未能斬釘截鐵。或有人問興化。去却僕從。便請相見。只向它道。家無小使。不成君子。

龐居士問石頭。不與萬法為侶者。是什麼人。石頭以手掩其口。又問馬祖。祖云。待汝一口吸盡西江水。即向汝道。

師云。大眾。二大老。一等是垂手為人。寧免入泥入水。要見龐公麼。也只是个俗漢。

三平問大巖。不用指東劃西。請師直指。巖云。幽州江口石人蹲。平云。此猶是指東劃西。巖云。若是鳳凰兒。不向那邊討。平便禮拜。巖云。若不得後語。前話也難圓。

師云。三平上門上戶疾如風。磨牙利齒猛如虎。當時若不是大巖深辨來端。安得這漢腦門著地。

乾峯示眾云。舉一不得舉二。放過一著。落在第二雲門出眾云。昨日有人。從天台來。却往徑山去。乾峯云。典座來日不得普請。

師云。一人高高峰頂立。一人深深海底行。且道那個在前。那個在後。(拍膝云)賊賊。

臨濟侍德山次。山云。我今日困。濟云。寐語作麼。山擬拈棒。濟便掀倒禪床。

師云。二大老。如毒龍攪海。金翅騰空。撿點將來。二俱弄嶮。廓侍者問德山。從上諸聖。向什麼處去。德山云。作麼作麼。廓云。勅點飛龍馬。跛鱉出頭來。山休去。明日浴出。廓過茶與

山。山遂撫廓背云。昨日公案作麼生。廓云。這老漢。今日方始瞥地。
師云。背手抽金鏃。翻身控角弓。不無廓侍者。爭奈老德山。有當斷不斷不招其亂底劍。雖然寧免旁觀者哂。

頌古

趙州訪茱萸

心手相忘。二俱得妙。箭箭中的。未脫窠臼。脫窠臼。好手手中呈好手。

芭蕉示眾。你有主丈子。我與你主丈子。你無主丈子。我奪你主丈子

多處添些已。是訛。少處減些還是誑。幾多著眼看機輪。誰知不在機輪上。

僧問趙州。狗子還有佛性也無。州云無

狗子佛性無。鐵缸水上浮。順風帆未掛。已過洞庭湖。

岩頭纔跨德山門。便問。是凡是聖。山便喝。頭便禮拜

鈍如出匣吹毛劍。快似堅剛百煉鎚。直下低頭禮三拜。得便宜處落便宜。

僧問智門。蓮花未出水時如何。門云。蓮花。出水後如何。門云。荷葉

出與未出。蓮花荷葉。老倒智門。舌頭無骨。

趙州勘婆

盡道趙州勘婆子。不知婆子勘趙州。有意氣時添意氣。不風流處也風流。

六祖風旛

不是風兮不是旛。活人只在笑談間。面前坦坦平平路。背後重重疊疊山。

香巖擊竹

拋磚引玉老香巖。打著南邊動北邊。聽事不真鍾作甕。至今千古錯流傳。

靈雲見桃花

撥草瞻風尋劍客。桃花一見便忻然。直饒真到不疑地。放下更參三十年。

地藏栽田

地藏栽田博飯。大似飢過心荒。聽它三三兩兩。佛法浩浩商量。杓柄那知有短長。

仰山摘茶

撼樹良久。好手手中呈好手。得用得體。一不成兮二不是。三十丈放渠儂。大似賊過後張弓。

法語

澤長老出世慶成需語

澤長老。英傑者流。荷負楊岐重擔。為眾所喜。余自江西來主斯席。見其穩重。一言半句。皆不妄發。卓然自有立志。私竊喜曰。此慈明會中再來人也。未幾。果為慶成而出。臨別袖紙需語。余曰。我宗無語句。亦無一法與人。只貴眼親手辦。直下承當。向未舉已前。領覽得去。方知老僧無說。汝亦無聞。無說無聞。是真般若。非惟覷破空生敗闕處。亦乃自得受用。至於執佛祖柄。倒行逆施。與一切人。開方便門。示真實相。無施不可更有一事不可不知。慶成山中。一隊小果聲聞。一箇箇點胸點肋。自謂。渾鋼打

就。生鐵鑄成。知它是果有所證耶。果無所證耶。新慶成到日。一一為我從頭按過。至祝。至祝。

偈讚

出山相

捏雙拳。衣露肘。謂悟明星。有甚分曉。本為修行利濟人。誰知變作不啣[口*留]。

觀音

楊柳枝頭。琉璃瓶裏。一滴渾無。千波競起。步步金蓮襯足生。何曾踏著自家底。

啞子觀音

贊者舌禿。畫者口啞。籃裏錦鱗。愈增高價。

維摩

俗氣不除。病在一默。扁鵲盧醫。醫你不得。

達磨携履

赤雙脚。携隻履。自東自西。誰不識你。最難掩是當門齒。

布袋

布袋橫拖。肚皮捺下。行貨有些。沒人耐價。拊背覓錢真奉化。

寒山把蕉葉執筆

吟詩吟未就。執筆且搜枯。欲寫芭蕉上。依前一字無。

拾得携苕帚

往來雙磬路。脚下起塵埃。苕帚忙忙掃。何曾掃得來。

靈照女

家業盡拋離。沿街賣笊籬。胸中無限意。不許老龐知。

朝陽

者邊才補了。又見那邊穿。不覺日又夜。爭教人少年。

對月

黑豆忙忙數。教休不肯休。幸然明似鏡。何用曲如鈎。

佛鑑和尚

兩過五峯。雲橫玉几。日面月面。只這便是。道是佛鑑。舌拄梵天。道非佛鑑。眉毛拖地。更言兩對君王三奉詔旨。看來元是陰平界上雍師波。誰不識你。

自讚慶成長老請

怡山頂不露。上有通天竅。事事總不知。虛明肯自照。个樣荔枝川僧。如何描邈得就。慶成訐露人前。早是外揚家醜。不用別舉話頭。我手何似佛手。

禮開山伏虎祖師塔

羊腸知幾折。行盡水村村。捫壁穿雲棧。攀蘿過石門。尋蹤知虎在。繞塔見師存。他日重來地。松枝拂蘚痕。

綿州曇上人求語上徑山

解唱東山瓦鼓歌。不知節拍有譎訛。要教聲響如當日。快向凌霄走一遭。

祥侍者化供

祥禪為眾下山來。七十高僧笑滿腮。袖裏金鎚曾未動。千門萬戶一時開。

偶成

那得工夫過一關。從空放下絕追攀。松風不入是非耳。竹徑肯通人我山。有問對談惟莫莫。無心袖手只閑閑。忽聞枝上靈禽語。似笑山翁癡復頑。

一上人之徑山

一處纔通處處通。凌霄突兀對青龍。道途不涉取親句。只在平常日用中。

欽禪人之天童

興化三門開兩邊。聚頭啣飯不談禪。天童有問其中事。収割今年勝去年。

傳上人之徑山

佛祖不傳希世寶。千人萬人覩不破。五峯相見索看時。切忌傾出一桮棗。

全上人之仰山

集雲峯下四藤條。千載誰知恨未銷。去去全身檐荷得。石龍依舊碧峩峩。

祖典座往南嶽

寂寞相從恰四年。不曾談著祖師禪。杖藜七十二峯去。點破蒲湘水底天。

化夏供

興化年來徹骨貧。口生白醜面生塵。不知那个無思筭。來飽無心閑道人。

贈月蓬相士

月蓬岩下電。相心不相面。劔關不露鋒。向甚處相見。

小師慧清遊山

行脚不遇人。不如屋裏坐。那事本現成。何須外邊討。東行西行。驀忽築著脚指頭。定笑玄沙錯認橘皮喚作火。

題瑞雲峯

山行百折路重重。到頂回頭眼界空。但覺衲衣冰樣冷。不知身在瑞雲峰。

題幽林寺

幽林卓錫地。香火續深禪。但見樹迷戶。不知頭頂天。雲開青嶂聳。瀑濺雪珠懸。一脉來何處。曹溪萬丈淵。

謝東禪月湖以諸祖偈頌見示

家貧路富鼻遼天。各立門風辱祖先。爭似太平無事客。長伸兩脚放憨眠。

小佛事

佛鑑忌拈香二

捏拳頭上。作女人拜。老倒楊岐。不勘自敗。青龍今日一爐香。一任時人話短長。有些臭氣。沒些巴鼻。你不識我。我不識你。因甚今日腦門著地(遂插香云)美不美鄉中水。

為開元毒海和尚秉炬

庚申八月是誰生。眼上眉毛八字橫。乙丑六月是誰滅。鼻孔遼天高突兀。機輪拽轉上頭看。毒海波瀾徹底乾。六月炎炎飛片雪。真實道人行履別這個。是毒海和尚末後所供口款。怡山一一為花擘了也。且道。如何是移身換步轉位回機底一句(以火把打圖相云)閃電光中轉法輪。正法眼藏驢瞎滅。

德善淨頭下火

衲僧臭氣苦無多。炙地熏天誰敢觸。盡情併蕩急翻身。六六不成三十六。正與麼時。不思善不思惡。如何是德善淨頭父母未生已前本來面目。(擲下火把云)照顧火燭。

徹侍者入塔

火後莖茆。目前包裹。若非徹證根源。要且覷它不破。覷得破。多子塔前迷逢達磨。

悟藏主火

迷悟兩忘。藥病俱遣。八面玲瓏。不撥自轉。面門拶著火星飛(擲下火炬)腦後依前欠一椎。

和上座火

了事禪和。只消一箇。掀翻本地風光。生死罕關抹過。纔與麼便不與麼。昨夜三更失却牛。天明起來失却火。

小師慧燈火(能接果木)

四十有九年。所成者何事。能回寒谷春。會接無根樹。計窮力盡。忽抽頭。失脚踏翻生死路。有佛處急走。無佛處莫住。(舉火把云)老僧末後贈汝這一段光明。是謂大夜之明燈。昏衢之慧炬。
劔關和尚語錄(終)

[CBETA 贊助資訊](#)

[.https://www.cbeta.org/donation/index.php](https://www.cbeta.org/donation/index.php)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

[前往捐款](#)

信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

劃撥捐款

郵政劃撥帳號: 1 9 5 3 8 8 1 1

戶名: 財團法人西蓮教育基金會

欲指定特殊用途者, 請特別註明, 我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".
